

A van indevant i studis su la lenghe furlane dopradè dai emigrants. Anna Sossi e studiarà la comunitât australiane

Lis ricercjîs sul ûs dal furlan fra i emigrants de Universitât dal Friûl a van indenand e, cheste volte, a rivin in Australie.

Al è pôc che a son stadis presentadis lis indagjinis de studentesse di Gonars Sofia Solayne Noboa Feliz realizadis te Sierade stade in Argjentine, e cumò la professoressa Piera Rizzolatti, docente di lenghe e letierature furlane, e à rivât a spedi in Australie Anna Sossi, 28 agns di Reane.

La fantate e je partide par Melbourne ai 19 di Avrîl. È starâ in Oceanie fintremai tal mès di Di-

In Australie, in cercje dal furlan

cembar par fâ la assistente di talian tes scuêlis par cont dal Coasit, un ent di Melbourne che si ocupe di istruzion e che, midiant di une convenzion cul ministeri talian gjestide de Universitât dal Friûl, ur permet a students talians di fâ cheste esperience.

Insegnâ talian al sarà par Anna il lavôr cuotidian; puartâ indenand scandais sul ûs de lenghe furlane, il so studi.

"Mi soi indotorade in Lenghis e letieraturis forestis tal 2004 a Udin cuntune tesi dulà che o vevi analizât l'ûs de lenghe furlane fra lis diviersis gjenerazions, cun cuestionaris tes scuêlis dal Friûl di Mieç - e declare Sossi -. Fate la prime lauree o 'nd ai tacade une altre in

Sciencis de formazion, par vè la abilitazion a insegnâ tes scuêlis. Cu la ocasion di lâ a vore tal forest, i ai domandât ae professoressa Rizzolatti di podè anticipâ i studis pe seconde tesi".

Il cuestionari che Anna Sossi e doprarà nol sarà tant diviers di chel doprât pes ricercjîs in Argjentine: un scandai socio linguistic, dulà che tes vôs par analizâ lis cognossincis ativas dai intervistâts e je stade zontade par fin la variante venete.

Prin di partî la ricercjadore dal Roiâl e à cjapât contat cun Friuli nel mondo, Filologiche, clape Friûl dal mont e altris associazions dal setôr.

Chê dal furlan, par jê, e je une passion compagnade cu la volontât di fâle diventâ lavôr. Fra une



lauree e chê altre, la fantate e à lavorât come sporteliste prime a Tisane, po a Faedis e tal ultin a

Reane.

"La passion pe marilenghe - e motive - si è infuartide studiantle te universitât, ma il furlan lu ai simpri fevelât: o ven di Reane, mê mari e ven di Tressin e gno pari di Dartigne. O crôt che lis tradizions a àn di sei puartadis indenand e no pierdudis: mi visi inmò cuant che o jeri piçule e a sceue i professôrs mi disevin che no savevi scrivi ben par talian parcè che o fevelavi par furlan, robe che no je par nuie vere. Mi plasarès lavorâ cul furlan e, se o deventarai mestre, o sperî di podè insegnâ ai frutins".

PIERO CARGNELUTTI